

expectans se divinitus adjuvari, sed sibi naturali possibiliitate sufficiens, quidquid laboris vel doloris ingeritur, pro justitia et vita æterna patientissime sustinet? An vero, inquiunt, idonea est iniquorum voluntas, Deo non adjuvante, ut se ipsi in cruciatibus pro iniquitate, et antequam ab aliis crucientur exerceant; idonea est voluntas moras vitae hujus amantium, ut Deo non adjuvante, inter atrocissima et longa tormenta in mendacio perseverent, ne sua facinora confitentes, jubeantur occidi; et non est idonea justorum voluntas, nisi eis vires desuper suggestantur, quilibet poenas, vel ipsius decore justitiae, vel æternæ vitae amore preferre?

XIV. Qui haec dicunt, non intelligunt et quemque iniquorum tanto esse ad quæcumque mala preferenda duriorum, quanto in eo major est cupiditas mundi; et quemque justorum tanto esse ad quæcumque mala preferenda fortiorum, quanto in eo est major charitas Dei. Sed cupiditas mundi initium habet ex arbitrio voluntatis, progressum ex jucunditate voluptatis, firmamentum ex vinculo consuetudinis: «Charitas autem Dei diffusa est in cordibus nostris, non utique ex nobis, sed per Spiritum sanctum, qui datus est nobis¹.» Proinde ab illo est patientia justorum, per quem diffunditur charitas eorum. Quam charitatem laudans atque commendans Apostolus, inter cætera ejus bona dixit eam et cuncta sufferere. «Charitas, inquit, magnanima est.» Et paulo post ait: «Omnia tolerat².» Quanto ergo major est in sanctis charitas Dei, tanto magis pro eo quod diligitur, et quanto major est in peccatoribus cupiditas mundi, tanto magis pro eo quod concupiscitur, omnia tolerantur. Ac per hoc inde est patientia vera justorum, unde est in eis charitas Dei; et inde est patientia falsa iniquorum, unde est in eis

¹ Rom. v, 5. — ² 1 Cor. xii, 4 et 7.

cupiditas mundi. Propter quod dicit Joannes apostolus: «Nolite diligere mundum, nec ea quæ in mundo sunt. Si quis dilexerit mundum, dilectio Patris non est in ipso.» Quia omne quod in mundo est, concupiscentia carnis est, et concupiscentia oculorum, et ambitio sæculi: quæ non est ex Patre, sed ex mundo est¹.» Hæc igitur concupiscentia, quæ non est ex Patre, sed ex mundo, quanto fuerit in homine vehementior et ardenter, tanto fit quisque pro eo quod concupiscit, omnium molestiarum dolorumque patientior. Idecirco, sicut supra diximus; non est ista patientia desursum descendens: patientia vero piorum desursum est descendens a Patre lumen. Itaque illa terrena est, ista cœlestis: illa animalis, ista spiritalis; illa diabolica, ista deifica. Quoniam concupiscentia, qua fit ut peccantes omnia pertinaciter patientur, ex mundo est; charitas autem, qua fit ut recte viventes omnia fortiter patientur, ex Deo est. Et ideo illi falsæ patientiæ potest sine adjutorio Dei voluntas humana sufficere; tanto durior, quanto cupidior; et eo tolerabilius mala sustinens, quo ipsa fit pejor: huic autem, quæ vera patientia est, ideo voluntas humana, nisi desuper adjuta et inflammata, non sufficit, quia Spiritus sanctus est ignis ejus; quo nisi accensa diligit impassibile bonum, ferre non potest quod patitur malum.

XV. Sicut enim divina testantur Eloquia, «Deus charitas est, et qui manet in charitate, in Deo manet, et Deus in illo manet².» Quisquis ergo contendit haberi posse Dei charitatem sine Dei adjutorio, quid aliud contendit, nisi haberi Deum posse sine Deo? Quis autem hoc dicat Christianus, quod nullus dicere audeat insanus? Exultans ergo apud Apostolum vera, pia, fidelisque patientia, dicit ore sanctorum: «Quis nos separabit a charitate Christi? Tribu-

¹ 1 Joan. ii, 15, 16. — ² Id. iv, 16.

» latio? an angustia? an persecutio? an fames? an nuditas?
 » an periculum? an gladius? Sicut scriptum est: Quia pro-
 » ter te mortificamur tota die, deputati sumus sicut oves
 » victimæ¹. Sed in his omnibus supervincimus per eum qui
 » dilexit nos: » non per nos, sed, « per eum qui dilexit nos.» Deinde sequitur et adjungit: « Certus sum enim, quia neque
 » mors, neque vita, neque Angeli, neque Principatus, ne-
 » que Potestates, neque præsentia, neque futura, neque
 » altitudo, neque profundum, neque creatura alia poterit
 » nos separare a charitate Dei, quæ est in Christo Jesu
 » Domino nostro². Hæc est illa charitas Dei, quæ diffusa est
 » in cordibus nostris: » non ex nobis, sed « per Spiritum
 » sanctum, qui datus est nobis³. » Malorum autem « con-
 » cupiscentia, » propter quam in eis est falsa patientia,
 » Non est ex Patre, sicut dicit apostolus Joannes, sed
 » ex mundo est⁴.

XVI. Hic dicet aliquis: Si ex mundo est concupiscentia malorum, per quam fit ut mala omnia pro eo quod ab illis concupiscitur perferant, quomodo ex eorum dicitur voluntate? Quasi vero non et ipsi ex mundo sint, cum ab eis diligatur mundus, deserto eo per quem factus est mundus. « Serviunt enim creature potius quam Creatori, » qui est benedictus in sæcula⁵. » Sive itaque mundi vocabulo Joannes apostolus dilectores significaverit mundi, voluntas quæ ex ipsis est, utique ex mundo est: sive mundi nomine coelum et terram et quæcumque in eis sunt, hoc est, universam complexus sit creaturam, voluntas procul dubio creaturæ, quæ non est Creatoris, ex mundo est. Propter quod talibus Dominus dicit: « Vos de deorsum estis, ego » de sursum sum: vos de hoc mundo estis, ego non sum » de hoc mundo⁶. » Apostolis autem dicit: « Si de mundo

¹ Psal. xliii, 22. — ² Rom. viii, 35, 39. — ³ Id. v, 5. — ⁴ Joan. ii, 16.
 — ⁵ Rom. i, 5. — ⁶ Joan. viii, 23.

» hoc essetis, mundus quod suum est diligeret¹. » Sed ne sibi amplius arrogarent, quam eorum mensura poscebat, et hoc quod eos non esse dixit ex mundo, naturæ putarent esse, non gratiæ: « Quia vero, inquit, de mundo non » estis, sed ego elegi vos de mundo, propterea odit vos » mundus. » Ergo de mundo erant: nam ut de mundo non essent, electi sunt de mundo.

XVII. Hanc autem electionem non præcedentium in bonis operibus meritorum, sed electionem gratiæ demonstrans Apostolus, sic inquit: « Et in hoc tempore reliquæ » per electionem gratiæ salvæ factæ sunt. Si autem gratiæ, jam non ex operibus, alioquin gratia jam non est » gratia². » Hæc est electio gratiæ, id est, electio qua per Dei gratiam homines eliguntur. Hæc est, inquam, electio gratiæ, qua omnia bona merita præveniuntur humana. Si enim ulla bonis meritis datur, jam non gratis datur, sed debita redditur, ac per hoc non vero nomine gratia nuncupatur; ubi « Merces, sicut idem dicit Apostolus, » non imputatur secundum gratiam, sed secundum debitum³. » Si autem ut vera sit gratia, id est, gratuita, nihil invenit in homine, cui merito debeatur; quod bene intelligitur et in eo quod dictum est: « Pro nihilo salvos » facies eos⁴: » profecto ipsa dat merita, non meritis datur. Prævenit ergo etiam fidem, ex qua omnia bona opera incipiunt. « Justus enim, sicut scriptum est, ex fide » vivit⁵. » Porro autem gratia non solum adjuvat justum, verum etiam justificat impium. Et ideo etiam cum adjuvat justum, et videtur ejus meritis redi, nec sic desinit esse gratia; quoniam id adjuvat quod ipsa est largita. Propter hanc itaque gratiam, quæ cuncta bona merita humana ræcedit, non solum Christus ab impiis occisus est, verum-

¹ Joan. xv, 19. — ² Rom. xi, 5-6. — ³ Id. iv, 4. — ⁴ Psal. lv, 8. —
 — ⁵ Habac. ii, 4.

etiam « Pro impiis mortuus est¹. » Et antequam moreretur, non utique justos, sed justificandos elegit Apostolos, quibus ait: « Ego vos de mundo elegi². » Quibus enim dixit: « De mundo non estis; » et ne putarent se nunquam fuisse de mundo, mox addidit: « Sed ego vos de mundo elegi: » profecto ut de mundo non essent, ipsius in eos electione collatum est. Quocirca si per suam justitiam, non per gratiam ejus eligerentur, non de mundo electi essent: quoniam de mundo jam non essent, si jam justi essent. Deinde si propterea sunt electi, quia jam justi erant; ipsi priores jam Dominum elegerant. Quis enim potest esse justus, nisi eligendo justitiam? « Finis autem legis Christus ad justitiam omni credenti³. Qui factus est nobis sapientia a Deo, et justitia, et sanctificatio, et redemptio; ut quemadmodum scriptum est: Qui gloriatur, in Domino gloriatur⁴. » Ipse est ergo nostra justitia.

XVIII. Unde et antiqui justi ante incarnationem Verbi, in hac fide Christi, et in hac vera justitia, quod est nobis Christus, justificati sunt; hoc credentes futurum, quod nos credimus factum: et ipsi gratia salvi facti per fidem, non ex se ipsis, sed Dei dono⁵; non ex operibus, ne forte extollerentur. Bona quippe opera eorum non prævenerunt misericordiam Dei, sed subsecuta sunt. Ipsi quippe audierunt, ipsi scripserunt longe antequam Christus venisset in carne: « Miserebor cui misertus ero, et misericordiam praestabo cui misericors fuero⁶. » E quibus Dei verbis, tanto post apostolus Paulus diceret: « Igitur non volentis, neque currentis, sed miserentis est Dei⁷. » Ipsorum etiam vox est longe antequam Christus venisset in carne: « Deus meus, misericordia ejus præveniet me⁸. » Quomodo autem possent alieni esse a fide Christi, quorum charitate etiam

¹ Rom. v, 6. — ² Joan. xv, 16. — ³ Rom. x, 4. — ⁴ 1 Cor. i, 30. — ⁵ Ephes. ii, 8. — ⁶ Exod. xxxiii, 19. — ⁷ Rom. ix, 16. — ⁸ Psal. lviii, 11.

nobis prænuntiatus est Christus; sine cujus fide quisquam mortalium nec fuit, nec est, nec esse aliquando poterit justus? Si ergo jam justi a Christo eligerentur Apostoli, prius illum ipsi elegissent, ut justi eligi possent; quia sine illo justi esse non possent. Sed non ita factum est, ipse quippe illis ait: « Non vos me elegistis, sed ego vos elegi¹. » Unde dicit apostolus Joannes: « Non quod dilexerimus Deum, sed quia ipse prior dilexit nos². »

XIX. Quod cum ita sit, quid est homo utens in hac vita propria voluntate, antequam eligat et diligit Deum, nisi injustus et impius? Quid est, inquam, homo aberrans a Cœatore creature, nisi Creator ejus memor sit ejus³, et eligat eum gratis, et diligit gratis? Quia ipse non potest eligere vel diligere, nisi prius electus dilectusque caretur, qui cœcitate eligenda non cernit, et languore diligenda fastidit. Sed forte quis dicat: Quomodo Deus prius eligit et diligit iniquos, ut justificet eos, cum scriptum sit: « Odisti, Domine, omnes operantes iniquitatem⁴. » Quomodo putamus, nisi miro et ineffabili modo? et tamen etiam nos possumus cogitare, quod medicus bonus ægrotum et odit et diligit: odit enim, quia ægrotat; diligit, ut ægritudinem pellat.

XX. Hæc propter charitatem dicta sint, sine qua in nobis non potest esse vera patientia; quia in bonis charitas Dei est, quæ tolerat omnia, sicut in malis mundi cupiditas. Sed hæc charitas per Spiritum sanctum est in nobis, qui datus est nobis⁵. Unde a quo nobis est charitas, ab illo est patientia. Mundi autem cupiditas, quando patienter sustinet onera ejuslibet calamitatis, gloriatur de viribus propriæ voluntatis, tanquam de stupore morbi, non de robore sanitatis. Insana est ista gloriatio; non est patien-

¹ Joan. xv, 16. — Id. iv, 10. — ² Psal. viii, 5. — ³ Id. v, 7. — ⁵ Rom. v, 5.

tiæ, sed dementiæ. Voluntas ista tanto videtur patientior acerborum malorum, quanto est avidior temporalium honorum, quia inanior æternorum.

XXI. Quod si eam exagitat et inflamat fallacibus visis et suasionibus immundis diabolicus spiritus et maligna conspiratione sociatus, efficit hominis voluntatem, vel errore dementem, vel appetitu cuiuslibet mundanæ delectationis ardenter: quæ cum videtur intolerabilia mirabiliter sustinere, non tamen ideo etiam voluntas mala sine instigatione alterius immundi spiritus, sicut voluntas bona sine adjutorio sancti Spiritus non potest esse. Nam esse posse voluntatem malam etiam sine aliquo spiritu vel seducente vel incitante, in ipso diabolo satis ostenditur, qui per nullum alium diabolum, sed propria voluntate factus diabolus invenitur. Voluntas itaque mala sive cupiditate rapiatur, sive timore revocetur, sive lætitia diffundatur, sive tristitia contrahatur, atque in his omnibus perturbationibus animi quæcumque sunt aliis vel alio tempore graviora contemnat et perferat; potest et sine alterius spiritus instinctu se ipsa seducere, et defectu a superioribus in inferiora lapsando, quanto jucundius æstimaverit quod adipisci appetit, vel amittere metuit, vel adeptum gaudet, vel amissum dolet, tanto tolerabilius pro eo ferre quod sibi minus est ad patiendum, quam illud ad fruendum. Quidquid enim illud est, ex creatura est, cuius nota voluptas est. Quodam modo enim familiari contactu atque connexu ad experiendam ejus suavitatem adjacet amanti creaturæ amata creatura.

XXII. Voluptas autem Creatoris, de qua scriptum est: « Et torrente voluptatis tuæ potabis eos¹, » longe alterius generis est: neque enim, sicut nos, creatura est. Nisi ergo amor ejus detur inde nobis, non est unde esse possit in no-

¹ Psal. xxxv, 9.

bis. Ac per hoc voluntas bona, qua diligitur Deus, in homine non potest esse, nisi in quo Deus operatur et velle². Hæc igitur voluntas bona, id est, voluntas Deo fideliter subdita, voluntas sanctitate superni ardoris accensa, voluntas quæ diligit Deum et proximum propter Deum; sive amore, de quo respondet apostolus Petrus: « Domine, tu scis, quia amo te³; » sive timore, de quo dicit apostolus Paulus: « In timore et tremore vestram ipsorum salutem operamini⁴; » sive gaudio, de quo dicit: « Spe gaudentes, in tribulatione patientes⁵, » sive tristitia, qualem se dicit magnam habuisse pro fratribus suis⁶; quæcumque amara et aspera sufferat, charitas Dei est⁷, quæ omnia tolerat, quæ non diffunditur in cordibus nostris, nisi per Spiritum sanctum, qui datus est nobis⁸. Unde nequaquam dubitante pietate, sicut charitas sancte amantium, ita patientia pie tolerantium Dei donum est. Neque enim divina Scriptura fallit aut fallitur, quæ non solum in veteribus Libris habet hujus rei testimonia, cum Deo dicitur: « Patientia mea tu es⁹; » et, « Ab ipso est patientia mea⁹: » et ubi alias Propheta dicit, accipere nos Spiritum fortitudinis: verumetiam in apostolicis Litteris legitur: « Quia vobis donatum est pro Christo, non solum ut credatis in eum, sed ut etiam patiamini propter eum¹⁰. » Non ergo quasi de proprio faciat animum elatum quod sibi audit esse donatum.

XXIII. Si quis autem non habens charitatem, quæ pertinet ad unitatem spiritus et vinculum pacis¹¹, quo catholica Ecclesia congregata connectitur, in aliquo schismate constitutus, ne Christum neget, patitur tribulationes, angustias, famem, nuditatem, persecutionem, pericula, car-

¹ Philip. ii, 13. — ² Joan. xxi, 15. — ³ Philip. ii, 12. — ⁴ Rom. xii, 12. — ⁵ Id. ix, 2. — ⁶ 1 Cor. xiii, 7. — ⁷ Rom. v, 5. — ⁸ Psal. lxx, 5. — ⁹ Id. lxii, 6. — ¹⁰ Philip. i, 29. — ¹¹ Ephes. iv, 3.

ceres, vincula, tormenta, gladium, vel flamas, vel bestias, vel ipsam crucem timore gehennarum, et ignis æterni: nullo modo ista culpanda sunt, imo vero et hæc laudanda patientia est. Non enim dicere poterimus, melius ei fuisse ut Christum negando nihil eorum pateretur, quæ passus est confitendo: sed existimandum est fortasse tolerabilius ei futurum judicium, quam si Christum negando cuncta illa vitaret: ut illud quod ait Apostolus: « Si tradidero corpus meum ut ardeam, charitatem autem non habeam, nihil mihi prodest¹; » nihil prodesse intelligatur ad regnum coelorum obtainendum, non ad extremi judicii tolerabilius supplicium subeundum.

XXIV. Sed merito quæri potest, utrum et ista patientia donum Dei sit, an viribus tribuenda sit voluntatis humanæ, qua quisque ab Ecclesia separatus, non pro errore qui eum separavit, sed pro veritate sacramenti seu verbi quæ apud eum remansit, timore poenarum æternarum penas patitur temporales. Cavendum est enim, ne forte, si Dei donum istam patientiam dixerimus, hi quibus inest, etiam ad regnum Dei pertinere credantur; si autem illam donum Dei esse negaverimus, cogamur fateri, sine adiutorio et munere Dei in voluntate hominis esse posse aliquid boni. Neque enim hoc non est bonum, ut credit homo æterno suppicio se esse puniendum, si negaverit Christum, et pro ista fide qualecumque supplicium perferat et contemnat humanum.

XXV. Proinde sicut negandum non est hoc esse donum Dei, ita intelligendum est alia esse Dei dona filiorum illius Jerusalem, quæ sursum libera est mater nostra²; hæc sunt enim quodam modo hæreditaria, in quibus sumus « Hæredes Dei, cohæredes autem Christi³: » alia vero quæ possunt accipere etiam filii concubinarum, quibus

¹ Cor. xm, 3. — ² Galat. iv, 26. — ³ Rom. viii, 17.

Judæi carnales et schismatici vel hæretici comparantur. Quamvis enim scriptum sit: « Ejice ancillam et filium ejus: » neque enim hæres erit filius ancillæ cum filio meo Isaac⁴: » et Abrahæ dixerit Deus: « In Isaac vocabitur tibi semen⁵; » quod sic est Apostolus interpretatus, ut diceret: « Id est, » non qui filii carnis, hi filii Dei, sed filii promissionis deputantur in semine⁶; » ut intelligeremus semen Abrahæ secundum Isaac propter Christum ad Dei filios pertinere, qui sunt corpus Christi et membra, id est, Ecclesia Dei una, vera, germana, catholica, tenens piam fidem; non eam quæ per elationem vel timorem, sed eam quæ per dilectionem operatur⁷: tamen etiam filios concubinarum quando a filio suo Isaac dimisit Abraham, nonnulla eis largitus est munera, ne relinquenterunt omni modo inanes, non ut tenerentur hæredes. Sic enim legimus: « Dedit autem Abraham omnem censem suum Isaac filio suo, et filiis concubinarum suarum dedit Abraham munera, et dimisit eos ab Isaac filio suo⁵. » Si ergo filii sumus liberæ Jerusalem, alia dona exhaeredatorum, alia intelligamus hæredum. « Hi enim hæredes sunt, quibus dicitur: Non enim accepistis spiritum servitutis iterum in timorem, sed accepistis spiritum adoptionis filiorum, in quo claramus: Abba, Pater⁶. »

XXVI. Clamemus ergo spiritu charitatis, et donec veniamus ad hæreditatem, in qua semper maneamus, liberali amore simus, non servili timore patientes. Clamemus, quandiu pauperes sumus, donec illa hæreditate ditemur. Magna quippe inde pignora accepimus, quod ad nos ditandos pauper factus est Christus, quo in supernas divitias exaltato, missus est qui sancta desideria nostris cordibus inspiraret Spiritus sanctus. Horum pauperum adhuc cre-

¹ Gal. iv, 30. — ² Gen. xxi, 10. — ³ Rom. ix, 7, 8. — ⁴ Gal. v, 6. —

⁵ Gen. xxv, 6. — ⁶ Rom. viii, 15.

dentium, nondum contemplantium; adhuc sperantium, nondum tenentium; adhuc desiderio spirantium, nondum felicitate regnantium; adhuc esurientium et sitiens, nondum satiatorum: horum ergo « Pauperum patientia non peribit in æternum¹: » non quia et illic patientia erit, ubi quod toleretur non erit; sed « Non peribit, » dictum est, quia infructuosa non erit. Fructum autem habebit æternum, ideo non peribit in æternum. Qui enim laborat inaniter, cum eum spes fefellerit, propter quam laborabat, merito dicit: Perdidit tantum laborem; quisquis vero ad sui laboris promissa pervenerit, gratulans dicit: Non perdidi laborem meum. Dicitur ergo labor non perisse, non quia manet perpetuus; sed quia non est inaniter fusus. Sic et patientia pauperum Christi, sed ditanorum hæredum Christi, non peribit in æternum; non quia et illic patienter ferre jubebimus, sed quia pro iis quæ hic patienter pertulimus, æterna beatitudine perfruemur. Non dabit finem sempiternæ felicitati, qui donat temporalem patientiam voluntati: quia utrumque munus donatae donatum est charitati.

¹ Psal. ix, 19.

S. AUR. AUGUSTINI HIPPONENSIS EPISCOPI DE SYMBOLO.

AD CATECHUMENOS

SERMO I.

I. ACCIPITE, filii, regulam fidei, quod Symbolum dicitur. Et cum acceperitis, in corde scribite, et quotidie dicite apud vos: antequam dormiatis, antequam procedatis, vestro Symbolo vos munit. Symbolum nemo sribit ut legi possit: sed ad recensendum, ne forte deleat oblioquod tradidit diligentia, sit vobis codex vestra memoria. Quod audituri estis, hoc credituri: et quod credideritis, hoc etiam lingua reddituri. Ait enim Apostolus: « Corde creditur ad justitiam, ore autem confessio fit ad salutem¹. » Hoc est enim Symbolum, quod recensuri estis et reddituri. Ista verba quæ audistis, per divinas Scripturas sparsa sunt: sed inde collecta et ad unum redacta, ne tardorum hominum memoria laboraret, ut omnis homo possit dicere, possit tenere quod credit. Numquid enim modo solummodo audistis, quia Deus omnipotens est? Sed incipitis eum habere Patrem, quando nati fueritis per Ecclesiam matrem.

¹ Rom. x, 10.